



番樣樹葉項个大草蜢

一頭番樣樹愛種幾多年正會打？屋脣，毋知哪久擲落个番樣核，既經生到比一個百七公分个大人高兩倍較加，照該形投來看，應該生有三年恁久。毋過，三年來，該頭番樣樹，無結過半隻番樣，乜無看過佢開過一蕊半蕊个花！隔壁个伯姆講，毋會打个樣仔，留來做麼个，摻佢倒倒忒去好哪！莫留來碇位。

佢看該頭番樣樹，身體砸礮，葉仔青溜溜仔，喊佢同佢倒忒，實在毋盼得！倒一頭番樣樹，三五分鐘就好勢啦！毋過，愛種轉去，生到像該恁大，又愛等加兩三年！毋知麼人講過，倒較遽、種較難！就算毋會開花結子，乜愛同佢保留下來，恁著佢對空氣清潔、熱天遮涼多多少少有幫助、加加減減有幫搥正著！講也毋怕講，佢還係盼望有一日，番樣樹頂開到榮榮个花，結出一隻一隻青青个番樣，還有佢等等佢熟、等等佢黃个心情，在開花打子个時節。

好得無倒佢哦！今年个秋天，有一日朝晨，佢打開屋面前兼菜園个窗門，看著青青个番樣葉面項，有兩隻青青个草蜢，大隻个座底下、細隻个座頂高，兩隻背(baˊ)到共下！還有兩隻大草蜢，在離無幾遠个番樣樹葉面。佢從來就毋識看過恁大隻个草蜢仔，係毋係講佢生來大隻，青青个草蜢恬恬在青青个葉面項歇暍，實在盡難分人注意著。佢著驚一下，黏邊轉屋下，拿起手機仔來翕該大草蜢，順續上網查一下厥名仔。

該青青个大草蜢仔，就安到「臺灣大蝗」。看名仔就知，這品種係臺灣最大个草蜢，成蟲長大後，公个生來較細隻，嬖个生來較大隻。故所，該番樣葉面座頂高个係公个，座底下个係嬖个。大草蜢正孵出來个時節，好食禾本科同豆科植物个嫩葉仔，當好歇在低海拔山區个草寶肚，草食性个大草蜢，就好食草食葉。詳細同佢看，吾屋脣該頭番樣樹，原旦一葉一葉好好个葉仔，變到一析又一析、無完無整，原來就係大草蜢个傑作！

番樣樹，係大草蜢个新樂園。樹頂高个葉仔，係大草蜢好食个一品菜，完全毋使料理，生食就當好食；番樣葉面，又係大草蜢延續後代个彈簧床！朝晨暗晡，番樣樹頂高，傳來該唧唧唧个聲，就係大草蜢个好歌聲！

正經無想著，無斬忒个番樣樹頂，做得分佢看著臺灣大蝗，乜分佢知得大草蜢个性體。盼望明年、後年、年年个秋天，就做得在屋脣个番樣樹葉項，看著大草蜢靚靚个身影。

作者：邱一帆

☆詞彙學習☆

【番樣】fanˊ son：芒果。

【形投】hinˊ dauˊ：形體樣貌。

【倒忒】doˊ tedˊ：砍除。

【碇位】din vi：徒占空間。

【砸礮】zabˊ zen：健壯。

【幫搥】bongˊ ten：幫忙協助。

【歇暍】hiedˊ kun：休息。

【講也毋怕講】gongˊ ia mˊ pa gongˊ：說也無妨。

【係毋係講】he mˊ he gongˊ：要不是說。

【黏邊】ngiamˊ bienˊ：隨即、馬上。

【性體】xin tiˊ：性情。